

**ZAJEDNIČKA INICIJATIVA KLUBOVA PREMIJER LIGE BiH i NS/FS BiH
NADLEŽNIM ORGANIMA U BOSNI I HERCEGOVINI,
VLADAMA FEDERACIJE BiH I REPUBLIKE SRPSKE**

Mi, dole potpisani, predstavnici klubova „BH Telecom“ Premijer lige BiH i NS/FS BiH, upućujemo zajedničku inicijativu nadležnim organima Bosni i Hercegovini u cilju rješavanja statusnih pitanja nogometaša/fudbalera u Bosni i Hercegovini, na način da se istima omogući poseban status zaposlenika zbog specifičnosti zanimanja, koji se zbog iste ne može jednako tretirati kao uobičajeni radni odnos.

Odnos klubova i igrača definisan je na način da su klubovi poslodavci, a igrači zaposlenici, što znači da su obje strane subjekti radnog prava, kao i da se primjenjuje radno pravo kada je riječ o ugovoru među ovim subjektima. Međutim, sama potvrda statusa zaposlenika profesionalnim nogometašima/fudbalerima ne rješava gorući problem vezan za plaćanje njihovih doprinosa za socijalno i zdravstveno osiguranje. Naprotiv, zbog niza otežavajućih faktora, klubovi u Bosni i Hercegovini su suočeni s velikim poteškoćama pri redovnom izmirivanju tekućih troškova, koji obuhvataju i troškove za socijalno i zdravstveno osiguranje igrača. Visina poreza i stope doprinosa na isplate igračima prema trenutno važećim ugovorima o radu, dodatno opterećuju rad klubova kao poslodavaca, što posljedično prijeti postepenim gašenjem vrhunskog nogometa/fudbala u BiH.

Problem nije samo u kvalifikaciji radnog odnosa kluba sa nogometašem/fudbalerom, nego i u odredbama radnog prava koje su velikim dijelom neprikladne za specifičnu djelatnost kao što je nogomet/fudbal, a naročito odredbe koje se odnose na jednostrani raskid ugovora, odnosno otkaz ugovora od strane zaposlenika. Naime, u organizacionoj strukturi nogometa/fudbala je apsolutno neprihvatljivo da se igraču otkáže ugovor u toku trajanja takmičarske sezone, osim u posebnim slučajevima uzrokovanih krivicom igrača.

Iz elaboriranog stanja, proizlazi da su važeći zakonski propisi u Bosni i Hercegovini koji se odnose na prava iz radnog odnosa nepotpuni i neusklađeni, te kao takvi ne mogu biti primjenjivi shodno specifičnostima nogometne/fudbalske aktivnosti. Također, u entitetima na nivou Bosne i Hercegovine egzistiraju različita zakonska rješenja, koja prati i različito postupanje nadležnih organa. Stoga je nužno da se pravni okvir koji uređuje materiju nogometa/fudbala adekvatno uredi, i to na način da se uspostavi pravni status koji bi obuhvatao sve aspekte specifične isključivo za ovu aktivnost, a da nisu regulisani važećim zakonskim propisima.

Zbog svega gore navedenog, smatramo da bi bilo najbolje kvalitatativnim izmjenama i zakonskim rješenjima regulisati ugovorni odnos između kluba i igrača. Na sva sporna pitanja primjenjivale bi se odredbe zakona koji reguliše materiju radnih odnosa, odnosno pravilnika i drugih pozitivnih propisa svih sportskih udruženja. Prema trenutno važećim zakonskim propisima postoji mogućnost priznanja nogometašima/fudbalerima preferencijalnog tretmana zanimanja, a sve u skladu i prema specifičnostima koje trenutno čine radni odnos između klubova i igrača. Na taj način, igrači bi stekli stabilan radno-pravni status, a klubovi bi imali određene zakonske olakšice za potpuno i blagovremeno izvršavanje zakonom predviđenih obaveza.